


Monsieur

Les trois feuillets que ie vous auois enuoyez ne valent pas la moindre des honnestes paroles qui sont en la lettre qu'il vous a plu de m'escrire, et ie vous assure que i'ay plus de honte de vous auoir enuoye si peu de chose que ie n'en ay pretendu de remerciement. car en effect la crainte que i'auois de m'engager dans un traite qui fust beaucoup plus long que vous ne m'auez demande a este cause que i'ay omis le plus beau de mon suiet, comme en autres la consideration de la vitesse, les difficultez de la balance, et plusieurs moyens qu'on peut auoir pour augmenter la force des mouuementz qui different de ceux que i'ay expliquez. Mais afin que vous ne pensiez pas que ie face mention de ces choses pour vous donner occasion de me conuier a les y ajouter, ie satisferray icy au dernier point de vostre lettre, en vous disant a quoy ie m'occupe.

 i'ay iamais eu plus de soin de me conseruer que maintenant, et au lieu que ie pensois autrefois que la mort ne me pust oster que trente ou 40 ans tout au plus, elle ne scauroit desormais me surprendre qu'elle ne m'oste l'esperance de plus d'un siecle. car il me

semble voir tres euidentement que si nous nous gardions
seulement de certaines fautes que nous auons coutume
de commettre au regime de nostre vie, nous pourrions
sans autre inuention paruenir a une vieillesse beaucoup
plus longue et plus heureuse que nous ne faisons; mais
pourceque i'ay besoin de beaucoup de temps et d'ex-
periences pour examiner tout ce qui sert a ce suiet,
ie travaille maintenant a composer un abrégé de
medecine, que ie tire en partie des liures et en partie
de mes raisonnemens, et que i'espere me pouuoir
seruir par prouision a obtenir quelque delay de la
nature, et a poursuiure mieux cy apres en mon
dessein. Je ne respous point a ce que vostre cour-
toisie a voulu me demander touchant la communi-
cation des trois feuillets que vous auer, car outre
que i'aurois mauvaise grace de vouloir disposer
d'une chose qui est toute a vous, puisque ie vous
l'ay cy devant enuoyée sans ny reseruer aucun
droit, l'inclination que vous tesmoigner auoir

a ne la point communiquer, et l'affection dont vous
m'obligez, m'assurent assez que vous ne ferez rien
en cela qui puisse tourner a mon preiudice. Et
quoy que vous faciez il n'y a rien qui m'empesche
d'estre toute ma vie

Monsieur

du 4 Dec. 1637

Vostre tres humble et
tres acquis serviteur
Des Sautes

Faint, illegible handwriting on aged, yellowed paper, likely a letter or document. The text is mirrored across the page, suggesting bleed-through from the reverse side. The paper shows signs of wear, including stains and a small rectangular mark near the center.